

東
溟
文
集

東溟文後集卷之五

桐城姚瑩展和甫

防夷急務第二狀

鎮府會銜辛丑正月二十日

本年正月初六日准水師提督咨奉道光二十年十二月初二日

上諭以英夷包藏禍心無厭之求益無底止如有不得不攻剿之勢則兵貴神速不可稍有遲延坐失機宜務當體察嚴密防範其平日得力之將弁及應用之鎗礮火藥等件均當預爲籌備前調各兵雖已有撤回歸伍者而本地防兵爲數不少尤當分布要隘有備無患等因欽此又咨抄憲臺十二月初七日奏英夷復肆桀驁閩省各海口現在練兵調勇嚴密防守情形一摺當經咨會王提督並飛飭各屬一體遵行職道等會查臺灣防堵事

宜已於上年九月內詳繪圖說稟陳在案嗣奉憲文遵裁
撤杜勇漁船之旨職道於十一月二十日後酌量次第減
撤以節糜費本職仍督飭弁兵嚴行防守今英夷既仍有
桀驁情形自當如前派設壯勇以助軍威而昭嚴密伏思
臺灣孤懸海外南北二廳四縣綿亘一千四百餘里名爲
一郡實兼內地福興漳泉四府道里之長內地水陸二提
六鎮四協以全省兵力防守尙形喫重臺灣一鎮雖云水
陸官兵一萬四千除澎湖協兵隔海外在臺水師僅安平
一協及艋舺參將所轄不及三千人分守十七要口實形
單薄陸路弁兵分布郡城內外及諸廳縣存城分防一百
四十二汛僅敷彈壓而民情浮動姦宄時萌近又查拏鴉
片嚴緊愚民惡習一時未能湔洗匪類常思與官爲難定

海失守夷船遊奕臺澎深恐在地奸民乘機竊發內靖外
獲十倍內地之難欲計安全非徒手所能爲力儻不先期
預備一旦遇警則重洋閒阻內地縱有熊羆之師百萬之
餉不能飛渡此職道等日夕思維不無深慮者也再四熟
商現有急要四事不得不仰陳於仁憲者一曰海外經費
不可不裕臺灣昔時地方殷實紳商頗多每逢警變莫不
捐輸効力府庫亦常存銀二三十萬可先支應以待內援
然前人猶時以東顧爲憂自蔡逆騷擾海上商力大虧生
業消敗三十餘年矣繼以嘉慶十五年道光六年兩次分
類械鬥十二年張丙十六年沈知十八年胡布屢次作亂
元氣蕩然紳民縱肯急公多苦捐資無出而府庫備貯自
嘉慶年間已爲軍需用盡卽道光十三年奏發道庫備貯

十萬亦爲沈胡二案動支僅存五萬五千餘兩爲數無多殊不足恃上年籌備防夷並未領帑所用經費三萬四千餘兩酌動蘭廳未入額征存穀價外府廳縣尙挪墊二萬有奇職道現請飭司發還今年防禦事宜實屬無可支應且上年夷人圍銷禁物猶可守而不戰設今再至必當相機攻擊情事不同現據各廳縣紛紛稟請籌發經費每處萬數千金或至二萬爲數甚鉅其勢不能不給伏思前蒙預發本年大餉六萬所以爲海外計者實深且遠上年防夷卑府卽於此項挪用一萬餘兩本年經費若待請領來臺緩不及事不得不仍先挪用而大餉本隸亦屬緊要防夷久暫未可預期斷非寬爲籌備不可應請憲臺飭司於本年大餉之外撥銀十萬兩半給足重番銀來臺作爲防

夷經費更採前任吳藩司道光十八年之議奏明再撥捐
監銀十萬兩亦半給足重番銀解臺存貯道庫以備地方
不虞庶巖豈有恃無恐二曰大餉扣抵不可過多臺灣年
支兵餉二十二萬餘兩除在地錢糧雜款抵支外嘉慶年
閩省發常十五六萬或十七八萬嗣後司中扣抵款項漸
多然尙在十萬以上惟上年大餉止發六萬餘兩卽澎湖
需發銀三萬餘兩亦因抵扣僅發二萬兩藩司稽核度支
原皆應扣應抵無如各款內或因豁免奉剛或係軍需挪
掣或以捐攤未足或因交代奉追亦有本係應領因款冊
奉駁未給又民間希冀豁免錢糧徒事追呼仍多延欠若
非稍事通融則紙上空數之銀不濟實用恐海外兵餉缺
乏貽悞匪輕至澎湖窮島孤懸情形更亟應請飭司於臺

澎湖二餉應扣應抵之中察其事尙有因者准免扣抵司中少扣一分之餉則海外可減一分之憂遇事卽多一分之用三日派委大員協守澎湖查澎湖西距廈門水程七更東距臺灣水程六更四面大洋與臺灣同一孤懸幸地小民貧風氣淳樸尙無反側之患額設通判一員水師副將一協兩營弁兵一千八百餘名原足以資鎮守惟臺廈兩處現均戒嚴萬一夷寇猖獗倉卒難以救援澎湖需費需人必當籌計上年蒙前憲奏委副將葉長春帶經費番銀三千往同守禦職道亦籌番銀一千同卑府籌給銀番委丁憂之前署通判徐柱邦及司委署廳之雲霄同知玉庚往澎湖辦嗣因內地撤防禦副將給咨北上內地未再委員前往臺營所在皆關緊要將備弁兵實無可以調撥者

應請仍於內地各營遴選明幹大員同磨副將及該通判等協防要地並請籌給經費一二萬兩隨同大餉發交該廳存貯撥節動支俾無貽悞四日新鑄大礮分給臺澎以備要口上年省中鑄造八千斤及六千斤大礮原爲防夷之用此時當已告成臺澎大礮無過三千斤者應請將新鑄大礮酌給八千斤者二門六千斤者六門撥給臺澎郡城之安平八千斤二門六千斤二門淡水之大雞籠及滬尾各給六千斤一門澎湖之媽宮口給予六千斤二門庶爲得力以上四事均屬目前急務職道等督同卑府熟商意見相同王提軍亦以爲然伏祈憲臺俯念海外地勢孤懸夷情巨測悉准節司迅速核議施行

駁臺澎令壯勇不能登陣議

聞來稟及清摺已悉此次雇募壯勇防守礮墩並令多插
旗幟者爲夷匪來往臺澎無非窺探虛實以定來攻與否
彼見我口內無人則將乘虛入矣夫用兵之道我強則示
之以弱我弱則示之以強如果水師兵足船多或尙可恃
無如水師單弱不得不募壯勇以資防禦且多插旗幟海
口使不測我兵多寡但見岸防嚴密不敢侵犯豈非不戰
而退敵之策乎况臺地惡習游手之徒每際秋冬輒思蠢
動今借防夷收集使沿海窮民得以資生免爲敵用是攘
外卽所以靖內也惟通臺要口甚多每處募一二百人卽
已爲費不貲月日方長何能多募且使夷匪大幫若至尙
須調集陸營兵丁更多募壯勇數千人乃可決勝又豈數
百水師兵一二百壯勇卽能濟事耶現在守口登陸者只

用此數及乎臨時戰勝則當更有籌備此本司道所以另有通飭各廳縣並諭各保村莊團練壯勇以備臨時調撥也夷船游奕不定何時皆可窺探而我守口之人終日逸居恐其滋事且烏合之眾初無紀律故爲每日三次登陴之法使其練習隊伍號令整齊不亂一備敵人來窺一使漸知紀律今該員等僅每日點卯一次討海聽其自便有事再行齊集大失本司道召募守口之意矣臺民向遇有事無不臨時召募數千立至又何必先費此每日五十文耶此皆惑於安平人平時討海每日可得三四百文之言似乎每日百文不敷養活耳如果討海者每日可得數百文之利則沿海皆富人矣此言果的否耶爲此言者或竟自貪安逸不肯每日三次登陴故借口於鄉勇亦未可定

即使果實或惟安平之人然耳本司道現帶壯勇出門分別行日飯食錢二百文住日飯食錢一百二十文別無安家之費昨定章程守口壯勇每日飯食錢一百文每月犒賞二次又六百文核計正符一百二十文之數且每名先給安家錢一千文冬月復賞給綿衣錢不爲少矣北路皆然安平未便獨異仰再悉心籌商妥辦總以登陣爲要若人不在戍則與無人何異倘以安平人已僱定勢難再改則或姑畱備用另僱他處民壯前往亦可國賽港鹿耳門四草二鯤身諸處非安平之比或可免其登陣而不能不使之在口該員等酌之定海張鎮以懷諫不備失守奉

旨革職拏問本司道籌備防夷文檝具在將來設有疏虞該文武不能如約責有攸歸噬臍莫及其三思之至於

團練有效又見營兵驕惰虛糜經費時復滋事遂欲罷歸
柳竹塹兩營防夷兵殊不思鄉勇非他卽臺地之悍民也
能善取之故爲義勇苟一不善則亂賊矣兵亦猶是也不
肖將弁治之而驕惰苟得賢能將弁亦豈不可治之爲勁
旅乎冠雖敝不加於履辨等級所以養國威也臺營惡習
本司道非不知之卽鎮軍亦非不知也特鎮軍之力但能
練在郡四營之兵猶不能徧僅練千人他營則皆不能費
不足也卽此千人亦有內外之別內精兵實止六百人耳
例領錢糧不足全臺文武捐助練費豐厚倍于他營所以
獎拔之者亦優于他營故富而強整水陸萬四千人安得
盡如精兵之優厚哉全臺十三營皆鎮軍統轄而厚薄攸
殊諸營不能無怨鎮軍無如何也諸將中賢者猶不失其

律不肖者則藉爲口實坐使廢弛有由來矣吾思有以結
眾營兵心正賴防夷經費優給之干常得錢糧有加彼亦
人情也恩惠旣及乃可受吾驅策此一定之理今逞一偏
之見欲罷防夷兵專用鄉勇恐鄉勇由此而驕益輕諸營
設有反覆誰爲制之且以素怨之兵見文官偏用鄉勇必
怒一旦爲變曹丞能率鄉勇以討叛兵乎縱使能討必益
長臺人之亂禍不旋踵矣東漢董卓唐代藩鎮之不可制
皆由先假外兵以平內難所致可不戒之哉自古師克在
和臺灣孤懸海外全賴文武同心官民一氣庶幾眾志成
城豈可顯爲畛域廢本司道數年調輯苦心若如曹丞之
見是必無臺灣也其可乎哉

臺灣防夷經費請作正支銷狀

辛丑正月初四日

道光二十年十二月十八日准省局司道咨奉憲臺牌開
現准 欽差大臣伊忒定海夷船已經起旋南旋赴粵
聽候查辦浙省業已裁撤防兵閩省更應一律撤兵以節
糜費除咨行裁撤外合亟飭遵備牌到局司道卽速移行
汀漳龍興泉永二道福興泉漳福甯各府飭屬查明防禦
各項事宜支用及驛路各縣例應支付兵差用過銀數剋
日造具草冊呈核不准絲毫浮冒儻察有浮冒除核駁外
仍卽嚴參懲究至臺灣澎湖防堵各事宜曾發給澎湖番
銀三千元交存泉州府庫會否領去臺灣未曾領帑爲日
亦屬較短是否由該地方官捐辦抑應作正支銷卽飛速
移行該道府查復等因奉此先於前月二十九日奉到憲
牌遵奉 諭旨將各海口雇募漁船水勇撤退以節糜

費責成各鎮訓練弁兵嚴防海口欽此查臺灣防堵事宜自上年六七月閒夷船屢至臺澎窺伺隨時擊退之後卽經職道會同達鎮督府悉心籌商部署各路除澎湖一廳隔海移飭該副將通判妥爲籌辦外經於九月十八日將查明臺灣南自鳳山縣北至噶瑪蘭廳最要次要海口十七處相度地形建設礮墩分派員弁兵勇共用防夷弁兵三千四百八十一名屯丁二百名鄉勇二千四百六十名水勇五百二十名按口開具清摺繪圖貼說稟送憲臺察核並會摺奏明在案除六七月以前僅一二處轟逐夷船爲日無多經費有限由在臺文武隨時自行籌辦無用議外自九月初一日起各口一律設防至年底止鄉勇屯丁陸續減撤時經四月地盡全臺各廳縣用過經費皆遵職

道先定章程核實摺節用過實數隨時報明在局茲據臺灣府知府熊一本暨局員臺防同知仝卜年查明共發過礮墩器具旗幟號衣民船等項雜費番銀一萬三千六百餘元時價一三六折銀一萬餘兩鄉勇水勇屯丁八分口糧番銀二萬五千二百餘元一三六折銀一萬八千五百餘兩原派弁兵係分班輪守除下班不給費外實給弁兵三分鹽菜銀六千零九十兩三錢該府隨時稽覈尙無浮冒職道伏思臺灣四面重洋南北綿亙一千四百餘里港汊紛岐除大船不能出入之小口不計其最要大口已有七處次要小口十處皆不可不嚴加防禦名雖一郡實兼有福興漳泉四府道里之長而海外孤絕無援民情不靖較內地更爲吃重將禦外侮尤防內姦辦理情形亦較內

地倍難兵勇既不能少經費不得不籌現據府局查明約計郡城及各廳縣自上年九月至年底止用過兵勇等項口糧雜費紋銀共三萬四千六百餘兩若責成地方官捐斷無此力職道督同該府悉心核議所有道光二十年用過弁兵鹽菜及屯丁鄉勇水勇口糧兩項共銀二萬四千六百餘兩應請作正開銷此次經費並未領帑先經稟明在於噶瑪蘭未入額田園歷年征存穀價項下動支先後提用番銀一萬九千三百二十元合銀一萬四千二百零五兩七錢一分零尙不敷正銷銀一萬數百餘兩該府在於上年憲發本年春夏二季兵餉內暫行挪墊伏乞憲臺俯念海外防夷重務准將二十年用過弁兵鹽菜及屯丁鄉勇口糧二款作正開銷並將挪墊本年兵餉一萬零四

百二十一兩先發交領餉委員齎發來臺歸款至建設墩製備守具一切雜費銀一萬餘兩俱係各廳縣挪款墊應如不能作正開銷似當分年捐攤歸補第省局如何辦理未能懸揣儻內地各府屬用過雜費統准作正支銷臺灣事同一律辦理未便兩歧則竟請將臺屬用過雜費同口糧鹽菜一并作正支銷俟通局定後如有例不准銷應行攤捐之處仍與通省一律分年攤捐方爲妥洽而免事後周章至澎湖隔海上年防堵緊要蒙發給經費番銀三千元尙恐不勇職道於上年玉丞赴署任時亦在蔣廳未入額田園征存穀價內提出番銀一千元交玉丞齎往備用前此署廳孫化南用過防堵經費係挪用何款銀數若干泉州府存貯奉發之番銀會否領回此外有無不敷之

處屢次飭查未據該廳將用過數目造冊報核容再飭催查復一面飭在臺廳縣將用過經費分款造冊另文詳送抑更有請者臺灣今昔情形迥異文武各員辦公久形竭人此次防堵雜費皆係挪墊款項無多慮爲軍需挪墊殆盡尙待分年歸補實已無可再挪而夷情反側不定卽道庫備貯十萬兩經兩次逆案奏明動用外僅存五萬五千餘兩此係專案要款不敢輕易動用現在仍有防堵事宜實屬無可支應設海外有警內地不能飛渡接應所關匪細查前任吳藩司曾建議請奏再撥捐監銀十萬兩發臺備貯其事未行惟有仰求憲臺俯採吳藩司前議體察現在情形入奏一面飭司籌撥銀十萬兩卽附本年大餉來臺酌給若干支應防堵事宜餘仍存貯道庫以備不虞實

爲要著萬一洋面阻隔亦可濟一時之用管窺所見是否
有當仰祈察核飭交省局司道迅卽籌議施行

廈門有警臺餉不敷狀

辛丑七月二十六日

臺郡自六月以後厦船不到粵中夷務無聞省厦文報亦
形隔絕七月二十日忽聞鹿港行商傳泉商信言本月初
十日有夾板船三十四隻突至厦洋爲草鳥賊船勾引直
犯厦港焚搶鼓浪嶼等語聞之不勝駭異併據鹿港廳彰
化縣飛稟到郡所言大略相同伏思厦門重兵所在防守
最嚴傳言恐尙未確隨令覓僱快船飛往偵探臺灣孤懸
海外全恃厦門爲援今有此警未免人心惶遽民情浮動
之區尤堪危慮雖自十八年秋開先經職道收養嘉彰游
民八千人編造入冊上年招募各屬鄉勇水勇二千九百

餘名給予口糧分防海口復勸諭各莊總董頭人團練壯丁二萬二千七百餘名造冊候調藉以安固人心潛資約東北年在地匪徒尙無煽動然前此閩洋夷船并無大幫今廈門忽傳此信誠恐無知匪類乘機搖動甚或潛通海賊轉引逆夷來臺滋擾事勢實爲亟切當同熊守晤商達鎮飛飭陸路各營將備除存城弁兵不可動外所有外汛弁兵酌量添撥馳赴海口協同在地文武委員防守職道飛飭廳縣酌調各莊總董帶領團練義勇到口添防一面移會巡洋舟師一檢收回嚴守口岸郡城與廈門對渡根本迫近口門不可過多議將鹿耳門廢口同國賽港三鯤身三處口門用在廠不堪修葺哨船四隻並買民船十五隻加以大木桶數百箇裝載碎石預備臨時填塞庶免匪

船遠越以便專力安平連日督同府廳縣勸諭紳商各募
義勇稽查宵小府城本係土築每易坍塌四縣隨時修葺
葦款無多工料不能堅實先經熊守會營周歷勘視動項
興修不日可以完竣至西北沿海一面紳士前造外城沙
土質鬆城基近水早已坍塌今於外城內自小北門起繞
大西門至小西門周七百一十一丈密樹木柵以資捍衛
惟臺地紳商久形罷傲郡城郊商生理多在廈門聞警之
日無不驚惶事勢迥非昔比極意拊循慰勉始覺鼓舞奮
興遠近士民亦聞招卽至察看民情似尙可用最要者上
年以來通臺十七口設防兵勇最多計原設復設添設現
共用弁兵三千九百三十九名鄉勇水勇屯丁六千四百
八十名口糧鹽菜增加一切攻守事宜皆需整備爲時歷

久經費不貲上年係道府廳縣籌款墊應本年如蒙發銀
十萬兩由聯道隨時酌核飭行府局撙節支應現在僅存
四萬三千餘兩查各口防夷兵勇等項每月本已需銀七
八千兩今廈門有警又添防兵勇每月需銀一萬二三千
兩僑夷匪猝來用費更不可勝計即奏動道庫備貯亦不
足濟事蓋道庫十萬已經兩次軍需動撥僅存五萬餘兩
若不亟籌接濟必悞事機現據熊守稟請省局籌撥經費
銀三十萬兩實不爲多海外情形久在洞鑒之中自必俯
如所請儻司庫籌撥維艱不能一起給發務請憲臺飭商
省局司道剋日先發十萬兩迅委廳縣幹員由五虎門對
渡八里孕於九十月內解到應用餘於年內或正月開續
發十五萬來臺以資接濟職道督同熊守覈實度支斷不

致有虛糜儻有餘存卽可以補運道庫備此之款至澎湖
經費餉銀尙須省中另行委解儻若廈門有梗卽祈酌發
銀五萬兩併交此次委員由五虎門解來臺郡再封僱安
船仍交省來文武人員解往澎湖距廈尤近更爲緊迫也
再有請者臺地海口綿長一千四百餘里不但守口管帶
壯勇需人卽督同紳士義民稽查地方姦細押解各處餉
銀在在需員差委臺灣現除實餉署事守口各員外在郡
惟卽用知縣王廷幹一員候補府經歷丞龐裕昆一員候
補縣丞吳湛恩一員差委遣用乏人上年曾稟明畱委因
公革職之候補同知前臺灣縣知縣託克通阿在安平督
帶鄉勇並委丁憂之候補同知卽署澎湖通判徐柱邦在
澎湖協全防守今澎湖有王提臺駐守徐丞可調回郡差

道此外仍係乏人所憲臺行司遴選精明幹練之雜職二三員飭令來臺差遣委用又省城及臺地往來文報向由廈門行走緊要之件則另用一副由蚶江鹿港并行而蚶江以非正站每多延滯伏乞憲臺飭行泉州府蚶江廳嚴飭口胥遇有臺灣文報務填月日時刻立即發行並令泉州府城內設一官胥管理往來文報登記號簿一體查考是爲切要

再上督撫請急發臺餉狀 辛丑七月二十九日

前月二十日聞廈門有警臺灣防備宜益加嚴府存經費無多稟請憲臺飭司道局籌撥銀三十萬兩以備支應且分給澎湖正發行開準王提臺七月十七夜自澎湖來函言得家書夷匪勾通草烏賊船於七月初十日進入廈港

官兵不利退保同安澎湖軍需已盡尙虧兵餉商由臺庫撥銀一萬兩番銀一萬元並據澎湖協詹功顯及該署廳王庚移稟前情專差把總謝燿請領前來職道查廈港既經失守澎湖及全臺同時震動海外浮動之區尤堪危懼昔之所慮者英夷與在地姦民今則兼慮成幫之草烏盜船與沿海之土匪臺灣地亘一千四百里要口十七處小口倍之內外交警水陸兼防海外孤立情形唇亡齒寒尙未足喻雖憲臺經略有方大集師徒廈島可卽時恢復而海外諸傳莫辨真僞且臺鹿兩處郊商大半家於廈港自聞失陷一日數驚匪類復加謠播有非示諭所能鎮安者內地既無可請撥之師海外不可復置用兵之餉廈門於六月十一日裁撤義勇千九百人甫一月遂有失陷之事

則是義勇不可驟裁已有明驗夫以廈港兵卒之多石壁之堅重以大担門內各巖防備之密而鼓浪嶼後尙爲夷匪所乘則是大小口一槩皆須添設兵勇安得如許熊羆之士不竭之藏自當斟酌人地量度情形要非庫餉空虛所能措置伏乞憲臺俯念海外危切准如所請委員解給一面專摺入奏實爲至要本當由臺員奏緣未見內地明文恐乖事實是以未敢冒昧想在仁明之所燭照也至澎湖軍需旣已告盡現在廈門有梗誠恐省餉不能卽應不得不通融暫撥業已飭府在所存經費內暫撥銀五千兩番銀五千元先予解給以資接濟惟是臺灣經費轉更乏竭實已僅堪三日之需矣合併陳明

昨見蚶江應移鹿港廳文知劉道以大兵在泉州缺食輿

請招商赴臺買米不論大小商船一槩免配官穀足食之策誠爲緊要殊不知商船趨利若鶩一聞缺食之區無不爭先販運何待官招不過商民規避官穀以此爲名耳此時收拾人心免役利商亦無不可但所運官穀卽係內地兵食既免商運此事豈可不等職道之愚惟有請將二十一年臺運兵穀仍照上年半解折色之法全數由藩司發銀分給內地各廳縣以濟兵食其餘一半俟內地兵食充足海洋平竣之後再復商運舊規抑或仍解折色之處現飭臺灣府廳妥議另詳辦理惟折色解銀臺屬廳縣賠累甚鉅卽內地各屬亦所不願祇可暫行變通事平仍復舊章爲是至南鴻兵穀此時無船可配亦應俟商船到臺郡時方能配運耳

臺灣不能堅壁清野狀 辛丑九月

八月二十四日奉憲臺札飭逆夷船堅礮猛沿海若與交鋒萬難制勝不如誘之登岸四面埋伏截殺所有原設海邊大小礮位亟須移徙內地十餘里或三五里之險要隘口不合窺見如其船至海邊卽令沿海居民避徙內地協同我兵埋伏鳥鎗撞鎗撞礮長短各械俟其上岸時至隘口先用大礮轟擊繼以圍殺又奉札飭各處港口必須堵塞除面臨大洋及內港退潮水深止七八尺者及荒僻口岸不必計議外如有港口退潮水深丈餘夷船能以闌入之緊要內港速卽購備竹篾破船裝滿沙石分別填塞其夷船未到之時中間仍留小口以便商漁船隻出入如遇夷船竄至再行一併填滿以杜夷船聯踪闖突其由海岸

登陸及要隘之地如可挖濠卽迅速開挖寬深或暗埋蒺藜等物仍將何處緊要應辦緣由稟覆督核等因奉此祇聆之下仰見深燭夷情指示機要洵爲避實擊虛之良策當卽飛飭所屬各按地方情形遵照辦理伏思用兵之法攻守異勢攻以曠野爲利守以險隘爲宜而地勢不同民情差異則有未可一概論者自古守險非依山則據水平陸則深林密箐皆可爲守臺灣惟噶瑪蘭之蘇灣淡水之雞籠滬尾三口係大山高聳中夾口門可以據險憑高餘皆沿海平沙一望無際口門悉在水底或有沈汕暗礁可陷敵舟平時口門皆插竹爲標以進商船有事卽去其標故稱天險然亦僅數處大抵水口淺狹非夷人之所必攻餘皆無所據依守者極難立足自當退而設伏不與近海

交鋒然而其難有五海畔平曠村莊散漫處處可行並無扼要之所其難一也沿海之人十九皆窮其心叵測綿互千數百里人口繁眾遷之則無地可容無業可活置之則引敵登岸無所不爲其難二也臺地惡習最忌遷移匪徒每欲爲亂則造言恐嚇居民遷徙乘閒爲亂其難三也沈舟載石固可堵塞口門然無兵勇守之則堵者仍可以開塞者亦可以去其難四也臺人好亂無事猶造播謠言若撤退守口之兵則明示以官兵懼怯良者以爲官棄其民姦人益啟猖獗之志其難五也且如郡城西臨大海城外卽水僅恃安平一鎮橫互爲衛安平地狹東西一里餘南北二汕迤邐相連今守郡城舍安平更無退步城係土築未可言堅雖欲堅壁清野而不可得展轉籌思惟有因地

設施以求萬一之濟石壁雖不足當巨礮而舍此更無可
立足之區大礮雖不能破堅舟未嘗不可擊登岸之賊現
更用大竹篾編爲夾牆互數百丈中實沙土高僅五尺其
厚丈餘藉爲我兵避礮之具復挖長濠下埋釘桶以陷登
岸之匪其港門內橫列大木數排上安千斤礮各二門以
爲攔截更架棉包牛皮中藏勇士伺敵將近以礮擊之前
以大木數百頭上釘尖銳大鐵撓鈎中貫巨箠以撓其杉
板木排後用竹筏停泊儻敵礮破我木排則棄礮于水人
登竹筏而退誘其登岸擊之支港內則釘梅花木椿以阻
其闖突安平之北隔港六里爲四草亦砌築石壁夾牆七
十餘丈內設兵勇礮位以防敵人佔據過四草五里則鹿
耳門廢港用石填塞更六七里爲國賽港其處水口寬深

用不堪修葺哨船并買民船鑿沈堵塞港內仍設鄉勇屯
丁對岸一帶復聯集村莊團練壯丁設伏以防登岸安平
之南距礮臺七里爲三鯤身新開港口水深丈許現用大
木作水鹿角橫擱水中復用竹篾載石堵塞守以鄉勇復
于對岸聯集村莊練勇設伏以待更南六七里爲喜樹仔
小港地頗荒僻居民甚雜尤防草鳥賊船闖入亦聯集在
地之莊社團練壯丁以爲伏兵郡城西面圍以木柵七百
餘丈中安礮臺三座多設壯勇分守之郡城八門除弁兵
外復募壯勇一千四百名授以器械分段協守城內各街
分七十二境責成紳士勸民各募壯勇二三十名不等
共二千餘人多立木柵隘門巡防街道稽查姦宄此郡城
設守之大概情形也郡城以外鳳山縣仍駐埤頭以竹爲

城距海口二十里嘉義彰化二縣皆磚城距海口七十餘里淡水廳石城距海口十里蘭廳竹城距海口五十餘里而淡水之滬尾卽八里坌一水三十里直通艋舺彰化之番仔挖一水三十里直達鹿港此皆商民百貨所集闐闐之盛倍於城中杉板船皆可以至其次則嘉義縣丞所駐之笨港佳里興巡檢所駐之鹽水港市井頗稠皆瀕海數里幸港口淺狹卽夷人杉板亦不能至惟有懷遵憲示于各海口中擇其地有要隘可以退伏者將礮勇酌量分撤半守口門半爲埋伏誘其入而殲之儻或地勢不便則量爲變通辦理以期仰副請誥垂示之至意

一 委員請領經費狀

壬寅七月二十八日

臺灣孤懸海外四絕無援亂民不靖于內更寇數擾于外

地方遼闊海口叢立名雖一郡實互福興漳泉四府道里之長戍兵班滿久切思歸驅策已非易事且水陸一百七十餘處無非要汛調撥守口殊形單薄不得不多募鄉勇水勇以助兵力兵勇既眾又自二十年八月至今時逾二年軍裝口糧修城築堡濬挖濠溝鑄礮塞口製造器械一切攻守戰具經費在在不貲又有澎湖一廳隔海時告急于臺灣雖兩次委員解發銀四十萬兩又另給澎湖銀一萬五千兩番銀三千元經費不為不多無如兵勇既多時日復久伏思道光二十年二十一年兩次俱經開具全臺各口兵勇清冊通送憲核在案計自二十一年七月廈門失守是時一廳四縣十七口二次摺開防夷兵共三千九百三十九名鄉勇水勇屯丁六千四百八十名及至八九

月後夷船再犯雞籠南北兩路土匪相繼通夷作亂四縣添設防夷兵八百一十九名壯勇屯丁一千九百五十名連前共水陸弁兵四千七百五十八名水陸壯勇屯丁八千四百三十名至于夷來打仗數次臨時添調兵勇及南北兩路剿辦逆匪征調堵禦之兵勇尚不在此數內以逆匪作亂時雖經職道奏撥道庫備用銀三萬兩尚有臺灣府挪動兵餉銀一萬七千餘兩墊應省發防夷經費到臺不得不急行歸還至於澎湖一廳先是兵勇尚不甚多及王提臺移駐之後凡用防夷兵一千五百九十九名鄉勇水勇一千二百一十三名所有省發經費除歸還二十年九月至上年七月外已屬不敷上年七月至今皆係臺灣撥給又不下五萬兩此時似尙可支數月而臺灣則自上

年十二月時府庫已僅存十三萬餘兩支應各屬至今僅存三萬有奇職道深慮經費維艱防夷兵勇無不先定章程俾各屬遵照給領隨時開摺申送該府復同局員臺防同知全卜年時加稽覈絲毫不准濫應其派添兵勇相時酌量減撤而逆夷屢次犯境復時有大幫報復之謠卽如三月閒果有夾板十九隻來臺欲購在地姦民內應雖將其等引羽翼之草烏匪船擊敗夷無內應潛行遁去而各口戒嚴不敢稍疏日夜此其極力撙節不得不用之苦衷想邀明鑒本年職道會同臺鎮據實奏蒙 聖恩准再賞撥經費銀五十萬兩解閩以備臺灣提用約計此時各省常有到者茲當用度告匱之時謹委淡水廳大甲巡檢謝得琛赴省伏乞憲臺行司卽先發給銀十五萬兩添委

幹員協同謝巡檢由五虎門配船齋解來臺以便支應俟至十月閒再撥給十萬兩解臺更爲德便

夷船復來臺洋遊奕狀

壬寅八月

本年三月閒逆夷大幫船隻勾結草鳥匪船來臺冀圖滋擾經文武官兵義勇擊破草鳥船多隻擒獲姦民匪犯訊辦夷見無隙可乘潛引大幫遁去緣由業已具摺陳奏錄報在案乃夷船已去而草鳥匪船仍復往來各口伺劫復有彰化巨匪黃馬等聚眾專俟夷船到口作亂又經

本職職道

督飭文武先後擊破殲擒分別審辦茲于八月初五日接

據臺灣水師協邱鎮功臺防同知全卜年及文武委員義

首人等稟報是日午刻瞭見國賽港外洋有三桅夾板夷

船一隻自西南駛來山西北外洋而去等情

本職職道當卽飛

行各文武將各處壯勇酌量添設慎密防範續據探報該夷船於是夜三更時在國賽港迤北之馬沙溝外洋北汕停泊當飭卹副將督帶水師商哨船十九隻及水勇竹筏多張駛往攻擊併飭國賽港委員候補同知徐柱邦督率守口壯勇在岸陳列防堵

本職
職道

立卽會帶兵勇出駐安平

督率辦理初七日申刻據報該夷船見我兵勇嚴密卽插

起白旗施放空礮於初六夜乘潮逃駛師船追望無蹤而

本職
職道

回隨會同在安平演放礮位勘閱重修礮墩土壁事

竣于初八日晚同回郡城初九日未刻又據各口報稱有夷船一隻在鳳山縣之打鼓港南外洋漸向西北駛過四鯤身四草湖外游奕於申酉刻閉復向外洋駛去無蹤各等情前來查連日皆西風該夷船是否前後兩隻抑卽係

前此之船被風打回復行駛去均未可知但望見師船及岸上兵勇立卽豎起白旗則其不敢近岸攻戰情形顯然可見然夷情詭詐防範不可稍疏除飛筋在口文武員弁義首添加壯勇認真防備一俟近汕相機攻擊並會稟將軍督憲分銜稟咨撫部院外合將夷船復來遊奕駛去情形稟報憲臺察核

風聞廈門夷情反覆狀

壬寅十一月廿四日

前月廿日接據護送夷人往廈委員盧繼祖張肇鑿等稟稱遭風夷人二十五名及夷目顛林等九名均已到廈交收惟因顛林等在澎湖候風兼旬到廈稍遲廈門謠言四起以致鼓浪嶼夷會疑惑大生怨謗以爲臺灣兩次破獲夷人皆係遭風夷商不當正法等語職道不勝駭異前次

來臺夷官業已感服極爲恭順何以鼓浪與夷會忽生異議僕鼎查在江蘇與

欽差大臣議定一切和約章程

言定浙江福建廣東等省未接議和之信以前儻有攻擊夷船均當原情免議豈得顯違條約此端一起則向後各條皆不足據憑何信守至兩次來臺破獲之夷俱在未議和以前兩相爭戰彼此仇讎卽係遭風夷船尙當拵辦何況並非遭風商船現有原供及起獲船上礮械及廈門浙江營件浙撫營員印文冊摺現在貯庫確憑何能支飾竊意僕鼎查所到之處無不縱橫如志惟獨臺灣連遭挫衄有損彼威其恨可知諱敗誇強亦無足責但和議甫定不當有此一節誠恐訛言日久以僞亂真於大局必有關係憲臺必有先聞自必定策權衡以全大局事關夷情反復

職道既有所聞關係重大不敢緘默是以會達鎮據實上
聞言皆切直並無一字涉虛至夷情實在如何海外
無從揣測伏乞憲臺指示機宜是所幸禱再有請者夷情
詭詐多端難以理爭亦不必以一鎮一道而礙 國家

大局使海外又啟兵端職道愚見夷人深恨臺灣敗衄之
恥故爲此舉且彼既在廈門設立馬頭而臺灣與廈門對
峙鎮道二人在臺於彼諸多不便故爲此謀欲去其所忌
未必真爲正法之夷人抱屈也若鎮道更易似可相安惟
有仰懇憲臺密以此意奏 聞先將鎮道撤回候

旨一面善與之言不失 天朝之體彼見去其所忌自
亦無所藉口儻蒙 聖明垂鑒別賞差使則易地亦可

報効不必定畱在臺免致牽動大局似爲妥洽謹密陳

覆廉將軍乍雅給諭狀

道光二十六年十二月二十五日奉憲臺札開前駐藏幫辦大臣瑞奏行抵察木多查悉換防弁兵被阻情形據乍雅大呼圖克圖稱此次阻止官兵實因本年委員查辦夷案回川時給有印諭內稱六七月閒定有委員前來查辦若逾期或斷路滋事不與伊等相涉百姓因此不肯支應烏拉等語旋據各頭人將委員等所給漢蕃字印文諭單呈驗文字又復兩歧虛實無從質證等情奉 上諭委

員等發給漢蕃文字不符之處尤應隨案查明勿使藉口欽此查宣守等所給諭單其開究竟如何書寫因何漢夷字句兩不相符該牧亦係一同發給諭單之員自應先行詢明以憑將來會辦札到該牧卽速束裝來省面爲查詢

等因奉此卑職遵於本年正月初八日到省經將前給漢
字諭文并無翻譯所有蕃字乃該夷人自行添捏情形面
稟仰蒙憲鑒矣伏查道光二十五年正月卑職等自察木
多回省係分兩起行走宣守于正月初四日先到乍雅已
過卑職同丁倅後數日方到乍雅據該處頭人呈遞夷稟
求爲帶省轉遞并以宣守所給印諭呈閱查原諭內但稱
據乍雅六站頭人呈遞夷稟求爲轉呈中堂收閱准其帶
省呈遞該頭人等候至六七月自有飭知遵照等語并無
逾期或斷路滋事不與伊等相涉之言該頭人等復以所
遞夷稟求卑職同丁倅轉呈稱係訴說二呼圖克圖等罪
過之事恐壅于上聞再三求給准呈諭單當與丁倅商酌
夷性多疑若不收其呈詞給諭必疑卑職等別懷意見藉

此刁難又生枝節况宣守先所給諭本已列有四委員之
銜是以照前諭寫給只有漢文并無翻譯蕃字緣出鑪關
時明正土司所派譯字書喜樂彭錯一名通事彭錯一名
係隨同正委員宣守先行卑職同丁倅分爲後起僅有通
事彭錯一名及察木多回途仍分兩起行走故卑職與丁
倅隨行併無譯字之人乍雅眾頭人領去漢諭自行翻譯
作何添入斷路滋事不與伊等相涉之言卑職等無從知
悉此卑職等給與諭單漢蕃文字所以不符之原委也查
乍雅大呼圖克圖與其屬蕃木刁狡異常屢次誣捏之詞
已成慣技此次委員僅給漢字諭札准予帶呈夷稟并無
准其撤站輒敢自行翻譯添入斷路滋事與伊無涉之言
以爲藉口鬼蜮情形何能上逃明鑒事關入 告恐前日

面言無由備案謹更據實稟覆伏祈察核施行

東溟文後集卷之五終

東溟文後集卷之六

桐城姚 瑩展和甫

復管異之書 己丑

異之足下遠承惠問勞苦愁寂之中如親笑言又以僕起復有期慮其好熱鬧而不節用甚非今世所宜懇懇諄諄誨所不逮非相愛之深不能爲此言者頃得左匡叔書亦謂近日士大夫多修飾小節以爲進取而光栗原亦以謙謹相誡三君之言何其若合符節也三復規箴感歎不已僕今年四十五矣讀書二十年游歷仕途崎嶇憂患者又二十年不應憤憤然亦竊有微衷請爲足下言之夫志士立身有爲成名有爲天下惟孔孟之徒道能一貫其他蓋不能以同趨矣爲名計者謹言行飾廉隅此鄉曲自好之

所求也自東漢以虛聲徵辟天下爭相慕效幾如今之攻
舉業者孟子所謂修其天爵以要人爵也當時篤行之士
固已羞之明季東林稱多君子天下清議歸焉朝廷命相
至或取諸儒生之口固宜宇內澄清矣然漢明之季諸君
子不能戡定禍亂反以亡其身者無亦有爲天下之心而
疏於爲天下之術乎天下大矣不可以一言幾也有開創
之天下有承平之天下有艱難之天下開創人才無論矣
承平者務在休息教養士大夫言論從容坐鎮風俗斯謹
飾文雅之儒所以垂休聲也及乎承平日久生齒繁而地
利不足養文物盛而干盾不足威地土廣而民心不能靖
姦僞滋而法令不能勝財用竭而府庫不能供勢重於下
權輕於上官畏其民人失其業當此之時天下病矣元氣

大虧雜證並出度非一方一藥所能愈也今夫求馬者於冀北蓄蠶者於江南稼問農蔬問圃天下艱難宜問天下之士而與鄉曲自好者謀之其有濟乎奇才大略不世出必不在修飾邊幅中也漢明之季諸君子所爲視今何如吾猶不能無憾又况其下焉者哉且世之善爲修飾者初亦何能自好不過視時所尙爲之上以是求下以是應猶之夫攻其舉業云爾立身求己之實蓋未究心焉尙謂有洞燦於天下乎夫謙謹者君子之美德然既受人之爵宜憂人之憂食人之祿宜任人之事今於爵祿則取其大者厚者而於天下事則爲其微者細者曰是能謹慎供職吾不知所職又何事也嗚呼一生謹慎武侯語也乃以爲趨時之具無怪孔光張禹者流比迹於千古是亦大可痛矣

且夫舉業趨時者可以數變其文體爲人而趨時數變將
何以立身蓋通塞者命也好惡者人也吾之賦命有定而
人之好惡難齊命苟塞矣闕略者固非曲謹者亦可罪也
今日闕略明日曲謹不且兩失之乎吾愧道不足以濟世
才不足以救時乃其志則不欲曲謹求名聊存其面目於
百折崎嶇之後而不敢變者意亦有所差也異之責其好
熱鬪夫好熱者必熱中熱中者必慕勢異之視僕亦嘗慕
熱否耶三至京師足不及權要之門三爲縣令未嘗降志
於督撫所熱鬪者海內節義文章之士賢豪踈弛之人耳
數厄當道鬱塞困頓或跌宕於詩歌酒肆以發其無聊此
學問不能養氣耳豈好熱哉若夫節用之說固嘗思之然
以家無儋石之人生平結交當世賢豪以此贖其父母妻

子以逮五服三黨數十口無凍餒者二十餘年矣生平無
聲色服食珍玩起居之好嘗負官責巨萬然在官未嘗妄
取民間一錢及罷職去士民輒爭爲代償卒亦無鎔銖之
負國家人之於我何其厚也我嘗厚取於人而我之於人
必用節焉豐之入而嗇之出得毋爲鬼神怒乎吾嘗少也
不能悅人今老矣而塗脂澤粉以事後生異之謂我能之
乎雖然君子者求反正以可常不詭僻以立異三君勉我
以中庸之道將使之改過遷善則闔命矣勉以宜時則私
衷有所未安敢盡區區惟登敘之

覆程中丞書

辛卯九月

昨陳倒塘一事奉憲批河防機宜非地方人員所能遠悉
總須廣詢博問執端用中庶可不負委任飭卽會同廳營

察看情形隨時相機酌辦務使各幫同空軍船迅速星飛
南下卽見憲臺明察庶情於慎重公事之中寓造就屬員
之意竊惟服官之道當以慎勤爲本忠信爲質及乎治事
則首在識時其次因地又次觀人終于審事未有任心執
一而不乖謬者也卽以地方言之錢穀兵刑雖有成法而
用法之寬嚴緩急則又當體察而行時有異勢地有異宜
人有異等事有異情明乎四者然後可以無弊故或獄市
不擾而非姑息養姦或摘伏若神而非舞文深刻或豫備
幾先而非急或事至不動而非緩蓋治事如醫投劑可用
古方面辨證在乎切脈如明諭所云察看情形隨時相機
酌辦誠治法之要樞也然非廣詢博問則時地人事之異
何從而知非執端用中則寬嚴緩急之間安能悉當謹終

身佩之不獨河防機宜而已河防之事本所未諳非在工
年久目睹身勤縱使廣詢博問猶或未能了然執端用中
之難有倍於地方者如地勢之高下曲直水性之緩急通
塞其事至粗已有繼年在工而問之茫然者矣况其遠近
遷變倏息易形益非卑職之愚所能通曉此次奉委例塘
催運軍船本有成法謹會同廳營隨時相機辦理一俟軍
船出塘完竣卽回省銷差謹肅以聞

覆程中丞言莊午可事書

辛卯十二月

劉守備來常州傳密諭令回蘇州欽感無已莊午可以一
訟棍狡很惑眾數興大獄歷任有司往捕皆爲抗拒而回
畏之如虎病在養癰今以一知府三知縣會參將守備兵
勇八百人往復敗衄戕傷兵役而回事當入告非往日比

蒙諭此事只求免過不可見功誠荷慮事精詳昭示擣味
自分孤陋何幸蒙愛若此職才識本疏此事又非職守前
奉飭查略報情事極知此犯姻族皆衣冠士類聲氣廣通
治之必遭非謗前求免給文札已遵鑒允詎十三日回郡
而文武不及相謀已先二日輕進偵事奉諭而來不敢遽
去是以停舟待命適奉制府六百里檄文已調三營兵圍
捕令在常郡會辦二十一日又奉額臬司自無錫檄調從
軍詢商事宜本日而陳臬司以此間部署略定奉憲傳諭
往蘇告辭啟行臬司以卽日進兵必令隨行又使人堅留
頗有託責竊思職今年初至江甯御林藩司入幕襄事之
召在揚州還趙藩司隨行查賑之檄今在常州軍務倥傯
又違額臬司從戎之命雖見難而退亦君子所以立身而

自人觀之必謂輕視兩司跡同狂妄此所以展轉徬徨不能自決也曩在閩中捕誅要犯巨盜逾數百人常恐刑戮過重傷造物好生之仁猶幸械鬥劫擄之風稍戢閭閻安謐又在臺時朱蔚謀逆及事未起破獲之僅誅首惡其黨數百人解散以爲庶償刑戮之愆本年抹發江蘇冀以文治從容無事搏擊乃本願未償又奉此檄實所不期此犯奉旨捕之五年負隅未獲眾知其難即使克擒亦恐不能免過安敢言功憲諭誠爲明哲侯可脫身卽赴省面聆訓示感激之忱有非筆墨所能盡者

覆陶制軍言鹽務書

乙未九月

日昨奉命至運司署檢鹽案諸卷按年摘要以備查考連日逐款摘開清摺十二件於三十日戌刻呈都轉閱定馳

送行次計達鈞覽矣伏思此次開呈各款因爲時倉卒僅自嘉慶二十一年起至本年止凡二十年綱鹽之起運岸銷統帶奏銷征存報解以及商借帑本報効外支歷年大數可以一覽瞭然計丙子至庚寅十五年中運鹽之數僅丙子丁丑己卯甲申乙酉戊子六綱全運辛巳壬午癸未丙戌四綱則折半行運戊寅己丑庚寅三綱則分綱帶銷丁亥一綱全統庚辰鹽雖全運而課仍分年帶征未有如辛卯壬辰癸巳甲午四綱連年全運者也奏銷之數計二十年爲銀四千四百餘萬而辛卯壬辰癸巳甲午四年乃九百餘萬此皆以多爲美者也征收之數正項今昔略同惟雜項一款昔年多者六七百萬今則年裁一百一十萬耳蓋昔人以財爲悅先私交而後公義進於內者惟恐不

盈股削脂膏搜剔骨髓泛泛然有所不顧是以商力竭而
運庫空虛今則急公義而絕私交取於下者必量其力裁
革浮費減輕課本亟亟焉培養不遑是以商漸裕而運庫
充實此則以少爲貴者也自古善謀國者必因其本故保
民而後有賦保商而後有稅世安有民窮商困而賦稅能
長盈者乎有嘉慶中年之極盛斯有道光初年之極敝相
去不三十年前人之所以得正前人之所以失也明明覆
轍而議者猶以爲美競欲復彼舊規此豈謀 國之勝

算哉夫局中之事外人不知由不見故也今吾傾筐倒篋
噓而出之則道旁之人皆能舉數矣使彼洞然於今昔先
後之數與所以贏絀之故則得失之理人將自明不事喋
喋與辨瑩之愚計思作嘉道以來鹽法表編年於上而以

十二款者分十二層線註於下使不曉鹽務者亦可展卷洞然得失見則是非自明可以示天下信後世而都轉意爲不可故不敢多請而意則有未盡也嘉慶中鹽務最盛莫如乙丑以後前鹽政阿公在任之日今獨此十年未得查開而歷年鹽政運司之任帥及巨商之成敗皆大關係亦未能備悉雖由倉卒亦缺憾也商人資厚而運鹽多實乃國課之根本昔歲運十萬引以上者取今則五萬以上卽爲富饒矣若查取歷年某商行運五萬以上幾家何年長消何年倒罷使人考之亦見今昔司事之難易儻以尊意更索諸都轉發下俾瑩得見之可乎

覆賀耦庚方伯書

丙申正月

滿堂凡陋下材附青雲之末二十九年矣浮沈下吏不獲

一侍清言然大君子治績聲稱上結

九重之知下逾

嶺海之外士大夫操觚從政者無不仰爲當代偉人瑩之
景行更當何如也曩歲友人示以巨製經世文編伏讀旣
終甚歎賢哲所爲宏卓匪是不足爲明體達用願以芻蕘
一孔之見亦閒蒙採錄其言且感且驚思以一函自通而
疏賤中慚申紙復輟者數矣上年冬從陶泉都轉所遞到
賜書咨及閩事所以待瑩者甚厚誠非所敢當也沈疴未
瘳逾月乃起又有護理運符之役儼務煩冗瑣細不遑作
復今茲稍暇謹對以所知竊謂爲政之道非一所貴在乎
因地得人或弛或張惟用之當而已自古治邊地者莫先
威惠閩自大儒閒出文物聲名媿於齊魯然實山海交錯
悍陋之俗未能盡除也漳泉之械門臺灣之好亂無論矣

卽延建汀邵諸郡與江浙接壤而盜賊會匪出沒盤踞類非安靜文弱之吏所能治者惟福州福寧二郡屬或庶幾耳夫人材各有短長視乎上之器使爲地擇人當先其大而後其細威惠並著者上也強毅有爲者次之明習吏事者又次之應對便捷虛言無實皆足以害政未可用矣閩海巖壘水陸二提督陸路建寧一鎮汀州一鎮漳州一鎮邵武興化二協水師金門一鎮海壇一鎮南灣一鎮閩安一協而海外又有臺灣一鎮安平澎湖二協大小將弁數百員兵卒七萬數千有奇此用武之國也 國家昔嘗有事以定叛亂有餘今方太平以捕盜賊不足此其故何也大吏多文儒不習武事諸將皆以趨承交結巧取升階而弓馬技藝委諸弁兵風雲沙線委諸舵工水手宜其不

可用也苟欲講求必從上始拳勇戈矛火器弓箭風雲沙線有能嫻熟猛如彪捷如猱者皆不次而拔諸行閒習其勤勞作其勇敢恤其疲乏風氣所趨下好必勝何致歲費百萬金錢養此無用之情民哉苟不講練於平日惟責以不能捕盜雖日事參革有不勝其參革者矣是當留意者也今天下州縣甚苦疲瘠而閩尤甚蓋牧令辦公惟賴錢糧之有羨餘閩民抗欠成風歲征常絀不但羨餘不足供用且多方墊解以免處分安能不疲且困嘉慶中董文恪公帥閩福清生員聚眾抗糧文恪嚴捕其魁立請命誅之奏入

上以爲是各屬錢糧一時頓起旋遇

恩詔豁免天下積欠民間又存僥倖之心至今欠風復熾愚以爲自非災荒必當嚴辦欠戶否則不但司庫奏銷

時形支絀牧令虧空亦以愈多徒事撤參豈有濟哉臺灣一府孤懸海外積貲必使長盈而臺地正供所入皆米穀地丁銀款僅足支各官廉俸臺鎮所轄水陸十三營弁兵一萬四千有奇俸餉馬乾皆需司庫解往歲常二十餘萬此誠不可緩者特款目繁多常苦鞅轄其大端有三一曰截曠二曰換班三曰借支隔海行走往返動輒經歲然不過遲延月日猶可稽也積弊難清則在司書提塘之勾結蓋將備不諳例款惟書識是師書識則惟提塘是賴於例各營餉乾皆由臺府支給彼惡其近而易稽也往往越府而求諸司空白文領盈箱滿篋皆在提塘之家謀諸司書而時用之以故鞅轄益甚臺府詳查淮駁仍懸司書之手無由破其姦欺儻清弊源非從此究絕之不可以上所言

皆昔在閩中知見者如此今去閩久情事或又有更易且
閣下以明睿之資負果毅之力當機立折固無俟於鄙言
而猶曉瀆左右者不願虛善人受言之問抑欲假此求大
君子之教也儻蒙誨其不逮是則所深幸耳陶泉先生竟
病不起其遺缺 聖明簡放劉星報都轉現在常熟可卽
來瑩俟交替後卽擬請咨引 見肅此具復

上林制軍言西商腳私書 丙申三月

瑩於本月四日接護運篆今已旬日兩淮公事繁重本多
未諳遂節講求未易得其要領大約運商疲乏當恤其隱
情票貶散漫當約以紀律場產各有豐虧可以相時調劑
岸銷每形短絀必須嚴緝透私而其中情變萬端慮有所
窮勢有所格惟在得人經理乃地越數省人逾百族在官

任使既無如許賢員諸商亦無如許得力之人分置場岸
蓋大計則關乎國用而言利實盡於錙銖利在則爭

趨利亡則不顧以視州郡之可以法齊理喻者情形又有
不同前者鹽法做壞帑盡課懸自改制以來雲汀宮保與
陶泉都轉大力斡旋同心宏濟乃得五年全運四屆奏銷
商本漸盈庫貯充足成法粗定人心稍安憲臺復運以精
思益求美備瑩可隨事仰承訓迪庶免愆尤耳昨見江西
來信知江船夾私一案搜獲子店帳簿訊有端倪張守已
稟憲轅請從嚴辦竊以江船夾私本干例禁旣已獲破嚴
辦誠宜微聞張守欲因此延及岸商則過矣蓋商鹽一上
江船成本鉅萬懸於船戶之手雖有商廝押運而形勢孤
單恐懷不測船戶沿途收私盜賣亦無敢如何惟求包內

引鹽無缺或少缺卽爲大幸斷無通同使帶腳私自礙綱
鹽之理及至江岸則文武官人具在船戶始有畏忌交起
鹽包心虛情虧慮恐岸商家丁及管倉之人收鹽挑剔不
免給予規費此乃相沿數十年之陋習不特岸商知之卽
揚商明知而任聽因慮船戶之以包鹽爲規費也故水腳
每引比楚鹽加倍六錢夫江西路近於楚而水腳反多者
正爲此耳如其可裁揚商何肯甘心加價乎計無復之而
出於此此其苦衷亦可憫矣船戶貪心不足水腳旣盡復
帶腳私卽以私鹽變價爲交鹽規費所稱九十三兩者卽
此費千引千包者亦卽此費也故謂岸商知之而不能禁
則可乃謂以此牟利豈其然哉計西省額鹽二十七萬有
奇每年行銷不過二十萬而商人岸費幾四十萬兩利少

而費重揚商苦之皆欲避而趨楚每綱派運運使格外體恤而江船戶猶不愿裝西鹽每屆寫雇各商亦格外津貼此其病皆由岸費之重使然費何以重由鹽數少故攤派多也張守不察乎此乃以爲岸商罪誠恐岸商渙散而揚商益以衰足然則此舉以恤商疏引之初心轉爲病商細課之做政矣惟治船戶以應得之罪而勿問岸商情事始平大局保全非細兪運使月來病勢初服鎮江李生方頗效頃乃變爲泄瀉殊覺支離實堪憂慮并以附聞

與張子畏太守書

各岸商鹽滯銷乃目前大患其病固由鄰私臬私之侵越而船戶沿途夾帶腳私亦難保其必無聞西省委員拏獲船戶夾私一案已經足下通稟究辦俾船戶知所做畏免

侵正引具徵俾識精心深堪欽佩惟其中委曲情形有不
可不告知足下者自來商人辦鹽與船戶載運皆避西趨
楚每當開綱派運商人苦求免派西鹽運司特優勸而調
劑之如現在派西吉者貼以江運暢岸是也船戶不愿受
載西鹽各商皆格外津貼之故楚路遠水腳每引一兩二
錢西路近水腳每引乃一兩八錢是也此其爲故何哉蓋
西鹽年額二十七萬餘引實銷不過二十萬而岸費幾四
十萬金鹽數少而按引分派成本重於楚省故商情苦之
船戶載運楚鹽皆直抵漢岸就船售賣鹽無拋撒西鹽行
抵青山卸載起駁運省上倉層層拋撒所費已多而岸商
丁友不無挑剔船戶是以有門倉之費始則出於水腳久
之水腳盡以自用而取諸腳私所云九十三兩者卽此費

千引千包者亦卽此費也。不但岸商明知之，卽揚商亦明知之。否則非取引鹽抵費，卽莫肯受裝。蓋引鹽一上江船，則鉅萬資本懸於船戶之手，卽押運商廩亦情單勢孤，常懷不測之懼。船戶中途收私盜賣，亦無敢如何。商人自顧成本不能不委曲將就也。岸商不能禁止門倉之費，固非謂其通同牟利，則過矣。惟足下細察之。

與姚春木書

春木先生足下。昔嘉慶中，家惜翁在鍾山日，足下數從游。處聲獨伏居里門，偶至江甯翁爲言，足下未嘗不稱善也。惟異之伯言時與往還，且久，最後得交生甫，又聞於他處。見足下小文數首，益知所以爲人，及學與藝之美，欽重於茲有年矣。仕宦奔走不及通問，至揚州乃聞足下有大夫

人之憂計至思一爲言已復省念於古人知生知死之義
兩無所附而苦塊之中又不便敷陳文字與夫夙昔之所
嚮慕者用是抑鬱且輟去年秋李申耆吳仲倫二君見顧
生甫亦在坐中二三英彥先後畢集頗思延致足下而未
敢也今日之聞以兩世之交生平所欽嚮幸及同時又在
一省揚州距松江五百里耳乃不可一見能無悵歎乎計
來而不之復於心尤所不安此所以不能終無一言於足
下也瑩無似不能負荷家學卽惜翁文章亦不能仰承百
一幸賴足下與異之仲倫生甫及諸翁門下諸君子昌大
其言俾文章正軌久益昭朗可謂盛矣瑩雖罷駑豈能不
思一奮興乎竊謂文者載道之言其精與博者可得而言
之不可得而盡之而言之炎炎又不如行之慥慥諸君子

立身具有本末文章所發皆大遠乎今人而津津與古會
瑩自訟時有未足大懼不克自行其言獲罪於君子以是
不敢有所論述然遇有道君子未嘗不忻忻受益如足下
者安能不有以教之乎行至嚴州生甫相送及此與登釣
臺喟然思于陵之風又弔文謝二公之義益念平生交游
因致此書託生甫道其拳拳

與毛生甫書

己亥四月

去冬得兩書並詩册及李中翁書悉近狀窘乏而僕六月
發書竟未到繼知其船遭風是時方辦賊事未再作問今
歲又兩得手書方喜與練立人相處何意立人暫輟任去
現計吳中無復可託爲足下計者陳梁叔嘉禮雖成而困
於山左海外人無從著力蘊結曷已僕在此心事亦殊惡

劣聊爲言之臺本沃土其民士多富而好義乃自道光六年械鬥十二年張丙作亂兩用大兵十四十六兩年亂民再擾閭閻元氣蕩然有司亟謀善後修城建倉積穀一切派捐民閒復興建考棚動輒數萬創痍之後其何以堪又前此嘉義被圍時官借紳民數萬金事平不償前守某復呵責之以是富者疲於捐貲義氣亦衰此民之困於人者也臺人皆食地瓜大米之產全爲販運以資財用比各省皆熟米客不至臺人苦穀有餘而乏日用富家一切興作皆罷小民無從覓食盜賊益多此民之困於時者也地方官辦公全賴錢糧正供羨餘今以民閒缺用雖大稔之年而賦貢不前追呼所入十裁六七富歲民欠轉甚于荒年此官之困於民者也自張逆亂後賊黨一萬數千人散在

民閒時思嘯聚五六年來搶劫殆無虛日有司捕盜全賴懸賞購線破獲一案費數百金而歲常數十案此官之困於盜者也臺鎮自張逆亂後倡練精兵之議此正務也而練兵經費每歲取之官捐文自道府廳縣捐萬金武自參游都司供用亦數千金卽如僕每歲亦捐千六百金按季送給否則有鼓譟之虞臺鎮每年南北兩眸山巡皆以重兵數百人從所過廳縣供費自一二十金至二三千以爲例此官之困於兵者也官民之困旣如此矣而更有危亂之憂張逆餘賊皆無業之游民也迫之則立反置之則日事剽掠去歲春夏間嘉彰地方忽有樹生刀槍濁水澄清之異民閒以爲亂徵其勢岌岌臺鎮練兵雖勤而不得民心卽諸營亦頗怨之以重困之官撫重困之民將驕悍之

兵而處必反之勢此所以到任後日夕籌維不能安枕者也除患必先固本惟有躬行儉約以清治原裁減各屬供應去其陋規之甚者以紓官力撤轅門差事一切署中自備革去道役例差之病民者停諸工作興舉之科派勒捐者以蘇民困根本既固然後督飭有司急捕巨盜九十餘人悉置之法閭閻稍安然匪徒甚眾策其反謀未能已也乃請于督撫行聯莊收養游民之法使嘉彭二邑各莊頭人查其本庄少壯無業而惰游者除常爲亂首或大盜殺人正凶三者不赦外餘皆免究籍其姓名年貌以爲莊丁由本莊釀錢養之使巡守田園逐捕盜賊頒示委員周歷諸莊自七月至於九月所收游民八千有奇略以兵法部署之由是賊黨皆爲義勇其勢乃衰及九月間北路賊將

起親至嘉彰一路督營縣破獲在地誅之南路賊起亦飛
飭縣營馳往破散兩路擒斬逆匪積盜二百數十人地方
安謐未有蹂躪最後中路賊起臺鎮白將兵出賊皆潰散
僕親往軍中督營縣先後擒其渠魁從賊六十餘人鎮軍
復入內山窮搜賊巢獲其山東大王各路亦報獲賊匪百
數十人全臺乃定僕以九月初七日出巡十二月初五日
還郡臺鎮以十一月二十四日出軍正月十五日旋師所
至捕諸反賊摧朽拉枯民自擒獻由其黨先已收爲義勇
雖有倡亂而附和者少故破之易也先後入奏幸免勞師
糜餉殘害閭閻新春以來則比戶絃歌如未嘗有寇者此
去歲籌辦臺事之大略也來書以戢威用恩相勉計此次
先後擒誅賊寇不過四百餘人而收養者八千有奇閭閻

被賊之地無所殘害以此報命可乎足下此時竟安在申翁能健慰甚夫歲七十未有以壽容圖之練明府頃在何所春木自楚中有書來亨甫不知消息植之仍在粵未歸去年舍下喪一小女家兄亡兩孫內有一最佳者可悼之至

與湯海秋書 己亥四月

海秋仁弟閣下去夏到臺灣未一致書以地方多故籌所以安全之不欲空言瀆清聽負知己相愛之意比幸地方粗安閣下康濟爲懷識議宏達謹以近日情形言之可以共商推也臺灣在大海之中波濤日夕震撼地氣本浮動而不靜其人皆來自漳泉潮嘉尙氣輕生而好利睚眦之怨列械爲門仇殺至於積世故自孩幼卽好弄兵視反亂

爲故常初不必年歲之凶荒官吏之不肖也而年歲與官吏亦卽爲亂之隙無隙庶可不變卽有變亂而無所害是則治臺之術也臺自道光五年閩粵械鬥十二年張丙作亂當時大兵雖云平定而攻剿挫斬者不過十之一二其巨魁賊黨萬數千人猶在閩閩時思嘯聚十三年之許釁成十六年之沈知皆其遺孽也上年春秋間嘉彰道傍樹枝忍變刀槍之形虎尾溪濁水忽清民間以爲亂兆匪民所在百十爲羣肆行劫掠臺人所產米糖惟以商販爲利比歲閩浙皆熟米販不至富人乏用一切工作皆罷游手無業者莫從得食益有亂心昔人言凶歲多盜不知臺民固豐年亦多盜也是以下車首嚴捕盜之令捕斬九十餘人而盜風未已策具秋冬之閒必反非有以解散而安置

之不可蓋若輩自十二年後反謀熟悉其膽愈張更有蠢動其禍必烈而自來言弭盜者皆以清莊編查保甲爲言愚竊以爲不可蓋游民散在各莊爲匪尙易捕治一行清莊則匪人無所容是驅之爲亂矣且大姦倡亂向以若輩爲羽翼而自官招之卽爲義民與其既亂而招之何如未亂而用之若輩爲用則賊黨散勢必易成擒矣臺之南路爲鳳山一縣中路則郡城也嘉義彰化淡水廳皆爲北路道里綿長嘉彰盜賊尤多彰化民多習鳥槍形勢隔遠一有蠢動則嘉義及中南兩路皆掣其後前人往往受困故治臺以北路爲亟而彰化更在所先日夕籌之乃爲聯莊收養游民之法使嘉彰二邑民莊聯結互守頭人查其本莊無業蕩游者其贖錢米收養之以爲莊丁數百人之

莊養十數人數十人之莊養五六人或四三人無事則巡
守田園有事則逐捕盜賊刊刻示諭委員同地方官周歷
眾莊編查莊丁年貌名冊略以兵法部署之自七月至九
月事竣凡收養嘉彰兩邑游民八千餘人皆勁旅也九月
間賊果四起風謠頗盛兄出巡北路督飭縣營捕斬裁二
百數十人北路遂平南路賊起亦馳檄臺鳳二縣會營捕
獲百餘人鎮軍復出巡以鎮定之南路亦平賊無蔓延兄
以彰化最遠親駐久之無敢動者至十一月中路臺嘉之
匪賊起攻灣裏街汛以有備卻退所召各路匪民已先爲
莊人收養無應賊者營驛馳往賊送潰再約內山賊出攻
店仔口汛戕兵三人鎮軍聞之立統大軍出剿賊復奔潰
此十一月廿三日事也兄亦自彰化馳至軍中獲賊首胡

布及戕兵之賊十二人先斬以徇兇於十二月初五日回郡三路皆平大軍仍駐店仔口督捕逸匪入山窮搜擊斬擒捕百餘人全臺大定正月十五日鎮軍旋師此上年籌辦全臺之大略也然此第爲弭亂一時之計而臺灣近時之病固不止此其大者則在乎官民兩貧官貧則心有所餒不暇遠謀民貧則爭利愈急難與爲善古人云瘠土之民好義此言地土本瘠之民習於勤儉故無淫佚之思也若臺本沃土民久習於奢淫富而忽貧常人且不能安分况海外浮動之區乎以不暇遠謀之官治難與爲善而且思亂之民必無濟矣夫官胡爲而貧也官賴維民民賴維物物力耗竭富安從來臺民生財之道一日樹蕪二日貿易及其做也一耗於奢淫二耗於詞訟三耗於械鬥四耗

於亂逆五耗於盜賊五耗並至其竭固宜今欲治之必先富之其道奈何曰養其所以生去其所以耗而已夫民有地自能樹藝民有貨自能貿易惟有擾之者斯害其生苟去其耗則得其養二者雖殊其道一也今吾躬行節儉凡道署中向所取給於屬吏者減之裁之吾不擾吏然後可使吏不擾民凡奢淫之事以漸禁止所謂耗者去其一督飭所屬勤理獄訟不能無訟也惟連結之所謂耗者去其二一縣千數百莊莊有董事十數董事舉一總理之董之能無械鬥者有賞鬥者有罰所謂耗者去其三周防於未亂之先迅辦於爲亂之始善籌於旣亂之後所謂耗者去其四家自爲守人自爲保無業者有以資生爲盜者卽行浦治所謂耗者去其五去此五耗民乃可生生得其養

比及十年當將可復治臺以此庶幾乎夫治國比於亂
絲必得其端不得其端益滋蔓耳非善治也愚見若此質
之足下幸有以教之計足下補戶曹久當有轉遷由京察
而外簡庶可以行其素志利濟民物日跂望之

上督撫言全臺大局書

庚子四月

臺灣孤懸海外南北綿亙千數百里地氣本浮人心好動
命盜案多甲於通省分類械鬥變生頃刻布謠脅惑謀逆
造反習以爲常治理弛張之道與內地迥不相同南北兩
路情形又與郡城大異蓋郡城有鎮道府重兵鎮守姦民
尙知所畏嘉彰一帶毘連內山爲匪類淵藪隨捕隨聚誅
不勝誅且若輩視死如歸地方官駕馭稍失其宜卽激成
大案自康熙二十二年平臺以來迄今一百五十餘年姦

民倡亂數十起大半起於嘉彰而南路響應統計全臺之勢嘉彰兩縣既要且繁最稱難治臺鳳兩邑稍次淡水廳又次之噶瑪蘭爲山後新闢之地離郡城十三站險阻崎嶇鞭長莫及解犯提案甚費屢章幸地止彈丸尙稱易治澎湖廳孤懸海中戶口不及十萬地瘠民貧命盜案皆歸臺邑承審澎廳不過勘驗捕犯而已是蘭澎二廳皆要而不繁至於海洋風帆靡常文報解犯不能與內地一律稽程有兩船同時開駕一船先到一船遲至數月者有數船同聞眾船皆到一船漂無下落者卽如現在委員王豫成船漂粵東王鼎成身遭淹沒淡水劉丞四船赴任兩船遭風淹襲幕友家丁舵水數十人涉海之難此其明證所尤慮者臺灣在昔頗有沃土之稱民多曠土可開官亦寬大

爲政是以地方遇警官民趨事赴功皆不致竭蹶自嘉慶以來地利盡闢野無曠土生齒日繁民無餘贖情形已不如昔至十一年蔡逆擾亂南北騷然繼以十五年漳泉分類械鬥民日凋敝幸自十六七年至道光二三年地方無事閭閻稍安及乎四年鳳山則有楊良斌之亂六年有閩粵分類械鬥之亂十二年有張丙之亂十三年有許戇成之亂十六年有沈知之亂十八年又有張貢胡布之亂大兵數動官旣倉庫空虛民亦瘡痍滿目惟冀休養生息閭閻或可稍安而大亂之後遺孽猶存盜賊紛紜民之困於剝奪者一歲屢不登民之困於口食者二商船遭風戔常十數貨物傾耗民之困於財用者三昔之富商大戶存者十無二三是以詞訟日繁賦多逋欠元氣益蕩然矣民困

既甚官卽隨之不惟缺分疲瘠迥異曩時而軍需捐攤數加無已近者臺鎮奏練精兵文員歲捐盈萬每年出巡南北兩路地方不靖勢難少帶弁兵亦難拘定月日夫馬口糧地方供頓不貲逆案盜案人犯歲常數百解內地者亦百十餘名每獲一犯懸賞自數十金至數百金而流罪以下例解內地重洋遠涉每一犯需費番銀四五六十不等嘉彰二邑最多歲費鉅萬今更查辦鴉片煙案人犯不可勝紀而調臺廳縣又時挾短而來以內地之不足取償海外展轉挪移皆所不免苟至交代無不棘手揆厥所由非盡官之不肖也夫以浮動好亂之地當官民交困之時爲政之道似以撫緩爲先而緝捕更不可後捕犯解犯葬費不可驟道上年富陳前憲欲照淡水廳拳和官莊之例

奏明蘭廳未升科糧地畱爲全臺緝捕經費使各屬辦案
有資可免畏難苟安收弭患未萌之效此亦目前要務也
昔年臺餉除抵扣外司發常十七八萬少亦十二三萬近
年扣款過多撥亦愈少及本年只發銀六萬餘兩而兵丁
逾萬官弁數百人刻不容緩府中無款可籌則以各廳縣
應解之款劃抵使就地支放而各屬應解之款非虧空軍
需案內尙未補足卽民欠無征支絀萬狀民間亦生意日
蹙富室凋零遇地方有事裹足不前海外情形隱憂甚大
前者程督憲按臨臺地奏撥銀十萬兩貯道庫以備急需
沈胡兩逆案皆動撥臨時幸免周章而仍無補於全臺元
氣現在各屬無事之時已形竭蹶一朝蠢動勢必束手無
策此職道所日夜隱憂也海外安危關乎全省職道才識

短淺惴慄實深緣奉查詢地方不敢有所欺隱伏惟憲臺
接切地方事勢籌示機宜撫凋敝之民生咸安衽席俾愚
蒙之下吏得有遵循全臺幸甚

覆鄧制府言夷務書 庚子五月十二日

瑩以庚寅之歲皖江趨承節署得侍誨言自奉職江南雖
數有陳辭未盡私曲丁酉冬忽蒙 聖恩擢昇海外監

司戊戌夏閏受事時當巨逆甫平遺孽遍地各屬元氣虧
竭病楚百端兼之大案異災層出疊見妄意民情浮動之
區撫循瘡痍必鎮靜爲培養誅夷萃醜惟急務之先圖海
外安則內地亦安庶幾上紓 九重之憂下蘇吏民之
困不敢以細故操切致有方剗悞投之悔也一載後有名
巨寇以次度謀閭閻喘息略定而大府新更未蒙以地方

下問正恐區區無由上達今春二月欣聞世叔大人移節浙閩不覺以手加額謂海外從此可幸安全上報

天

子矣顧以憲節尊嚴不敢未及而言僅循例稟呈履歷適准司移知札詢所屬地方與現任各官才具當卽開摺具復附陳全臺大局情形未識有當高深否方企棟聞茲於五月九日金守自淡水遞手書至勦愆下逮幾及干言匪特忠蓋之忱昭然如揭且英謀碩畫深切著明欽佩之餘彌增感歎

聖天子所以顧諟再三東南半壁必倚資於元老也方今中外汲汲莫不以鴉片夷務爲事矣夷人敢十年詭計一旦爲

天朝燭破嚴定吸食販賣科條

自王公以及士庶輕者徒流重則論死蓋非此不能力去沈疴振啟聾瞶也繼因夷情狡譎絕其貿易有事用兵此

亦事勢之必然者夫英夷以貿易爲生計恃其狡悍肅制西南各島久矣今姦謀旣破不但生計無資且爲各島夷所輕姦謀破則必媿生計繼則必迫各島輕之則必怒灣門馬頭旣失復恐各島素爲伊所據者亦將動搖則必懼兼是四者安得不並力致命於我非有大創之誠如憲慮未肯帖然就我規矩也則簡練舟師選擇將帥修葺戰艦攻具以禦其外嚴禁奸民杜絕勾通謹守口隘以清其內此誠目前要務矣夷船堅大而便捷師船小者不足以安巨艦其大者水師又以帶重爲嫌來諭詢及王提軍昔造建威船制容往咨訪再以報聞嚮嘗問諸老商云夷船靈捷惟在布篷若師船易蔑爲布節節爲之則轉駛亦靈似可與善海洋者商之也竊意造大艦必先儲費工價非

倍於常例不可而造船之人又必習知洋面攻戰者親督之乃能有用誠能製巨艦十隻或八隻每船費以萬金期以半年當可竣工交提鎮大將領之每艦更助以集成字號及大中號同安梭大白底艚數十隻以爲羽翼庶可制敵取勝至於師船用礮不同平地大至千觔足矣通省各營如此者亦尙有之可以簡料而用憲臺自粵中攜至夷礮十數門若更集匠鑄五六千斤大礮以備陸地守口之用似亦非難惟理事廳不諳製造匠人攬和銚砂過多或非一火鑄成或礮內車磨不淨則用時必然炸裂宜得誠實曉事者監製乃可用耳水師懦怯者多風雲沙線尙有未諳何況攻戰然苟將帥得人勤求善者而駕馭之未嘗不可得力竊見前水師提督陳化成操守廉潔節制有方

熟悉海面情形上年曾與夷船接仗雖未能勝亦未敗創
礮火轟擊之下士卒偶有傷殘此乃軍中常事聞夷人亦
多傷斃落海者似未可以咎之遠與江南對調實爲可惜
計現在水師諸將實未見有更勝之者至於臺灣舊爲紅
夷之所踞誠如憲慮未能忘情此又瑩所日夕深念者夷
船關入必從深水臺灣各口惟大雞籠及滬尾與樹芬湖
最爲寬深其鹿耳門及鹿港近皆淺狹商艘三四千石卽
難收入何況夷船上年有小夷船一隻至彰化之五汲港
外洋面該地文武立帶兵船驅逐並未停留而去使人量
其汲口亦非寬深恐本地姦民勾引嚴飭營縣查拏鹿港
行舖有買賣鴉片烟者分別搜拏封與邇來各屬獲辦之
案不少果無勾引之人縱使夷船停泊惟有調集舟師嚴

防口外地方文武督率兵勇堵防口內斷其接濟是爲要
若臺澎水師二協及艦船營所有師船惟大號同安梭爲
最誠不足以攻擊惟可守口而已一旦有警不得不起王
提軍用之年雖七十有一精力甚強此乃老成宿將但必
假以事權畀水師聽其調度乃能得力此非奏明咨調不
可達鎮練兵甚勤能愛惜士卒惟臺澎洋面二千餘里非
陸營所能爲力必責成水師達鎮專顧地方以免顧此失
彼臺營各口礮位以安平鹿港二處爲多大至一二千斤
者不乏府縣諸城皆自一千斤至二三千斤以上臨時抽
撥未爲不可然師船皆小不足以安巨礮設有大敵非內
地舟師巨艦不能爲力今內地舟師方亟恐難兼顧臺洋
設有來者少則擊之思則堅守以計破之可也而區區之

思更有過慮者東南沿海奸民富者出資販賣鴉片貧者出力以小船竹筏爲之運送數十年來衣食於此一旦無以爲生又地方文武查拏不遺餘力紛紛下海爲盜者不知凡幾去冬以來商船劫掠甚多皆若輩所爲也巡洋舟師方調集併力以事夷船捕盜未免稍疎日漸滋多盜船成幫將與夷船合而爲患不能不更煩憲匯耳瑩才質魯下未能思出萬全惟在閩稍久目睹二十年來情形變異深思地方利害之端與夫前人所以得失之故不敢怠玩廢弛亦不敢目前趨利貽害方來以人心浮動之區當兵革數興之後官民交困深以根本爲憂整頓與培養二者不容偏廢而尤以和文武誅盜賊安反側撫瘡痍籌經費爲本計至於嚴烟禁防海口備夷船則更目前要務相其

輕重次第行之幸逢節鉞臨敢竭駑駘披瀝肝膽以聞
與達鎮軍書 庚子八月

弟啟行後於初十日同珊參戎范令到樹苓湖勘視先經
文武諸人建有礮墩草藜礮墩既低薄而短未能如式又
草藜只可駐札委員鄉勇尙無住處相度地勢酌定事宜
十五條同前次查勘安平事宜九條先後備具公牘移知
冰案矣十三日到番仔挖卽鹿港外口相距三十里此處
入口由內港七里至王功港又二十餘里方至鹿港自以
番仔挖爲要口其形勢與樹苓湖大略相同惟口門距岸
稍近不過五里耳口門一條沙汕無可立足仍須在內岸
防守黃令會同劉游擊在此築礮墩上安大礮三門關護
協亦在彼處派兵協防惟嫌其墩稍薄亦須添築堅厚至

王功港係在內港中途其地舊有礮臺上年地震塌壞黃令修整完好此處礮臺外皆淺灘寬約三里方及深水舟行之處臺上礮力恐不能到該文武又在礮臺之南築礮墩一座細加察看恐亦無用此處本汛兵只三十名須加鄉勇百名協防如果臨時緊要再添派陸營兵丁及團練之鄉勇可也應辦事宜已同諸人酌定俟五汛港勘過一並移知惟水師弁兵過少左營雖額設兵丁七百數十名除在安平協防外現在鹿港及番仔挖樹苓湖三口守兵只二百餘名每處皆不及百人雖有船隻無兵可配大敵將來言之實爲寒心二兄雖練有精兵亦不能處處兼顧弟深知鹿港情形總由陳將官平日廢弛營務今幸撤去而劉游擊到任未幾一時驟難整頓當此緊要之際惟有

多僱鄉勇除在岸防守外交本營酌配兵船略壯軍容而已若夷船至則以團練之義勇當之所可慮者左營要口兩處上下洋面三百餘里只游擊一人翁守備新自安平派來其餘千總未見一人把總外委亦甚寥寥不但無配船守口之兵抑且無帶兵守口之弁昨過蚶仔藪見把總龔正興頗爲壯健樹苓湖卽其本汛已經劉游擊派令在口防禦管理礮位此外殊不多得也望二兄商之江護協酌派千把外委各一二人前來帶兵並飭各水師將小汛弁兵盡數調赴海口防堵是爲至囑極知安平根本重地弁兵不敷分撥但北路單薄深爲可慮卽如安平一處前議募鄉勇四百人細思之尙覺不足現在守口每處只二百者以爲日甚多經費無出只能如此倘遇大幫夷船尙

不濟事昨令各莊總董聯莊團練壯勇該保內有五十餘莊以上者團練千人或八百人三十莊以上者團練五百人或三百人聽候臨時調撥半守本莊半聽撥用已出示札行各縣未審二兄以爲何如蓋守口之兵勇經時累月銳氣已過非此生力之軍不能應敵也思慮不周之處尚望指示妥商是所禱切

再啟者前書將發適接兩司來文欽奉

諭旨以臺灣

防夷事務緊要令與在籍提督王某會同商辦欽此除備公牘移知水案咨會王二兄外並以附聞弟思前此制府專函請王二兄內渡而旨意令其在臺自以臺灣緊要仰煩 聖厯如此王二兄內渡可緩自後一切事宜惟有欽遵 諭旨辦理既在其事總以協力和衷爲是二

兄必能不念前嫌仍尋舊好何幸如之

與王提督書

庚子八月

本月十七日接准司文奉咨之後二日曾布詳函交玉丞齋呈二十一日奉到惠書知欽奉

上諭之件已達而

前函尙未奉覽承示此時惟協恭同心奉公爲念斷不更計鎮軍前事足徵二兄忠盡大公如青天白日下懷不勝欽佩達二兄處弟亦寄函婉商尙未得其回書也弟此閒勘過樹苓湖番仔挖王功港五汊港各口謬籌辦法因各處情形稍別是以章程小有不同均經備具公牘同近日接到省文先後咨移察照大約目前事勢且先議守守備旣周然後議戰此乃不可易之理臺灣口岸甚多最要者郡城之安平大港卽四草人郡之咽喉四草難守不知大

港扼要故守四草尤以大港爲重嘉義則樹苓湖卽象鼻湖之下湖也彰化則番仔挖卽鹿港王功之外戶也淡水則八里岔與雞籠二口必分據守之此五者爲最要其次則以安平鹿耳門以北之國賽港大港甚近之三鯤身此又左右輔翼於大港者也三鯤身與大港甚近易守惟國賽港遠而其地沙汕不可立足內埔雖設文武汛房而四面環水兵無退步此兵家所忌也守之不便議俟臨時塞其港若鹿耳門則久非商船之所出入竟以塞之爲是南路惟打鼓港東港二口打鼓本有礮臺距埤頭十里守之尙易東港無礮臺似當設礮墩也北路又有五汊港卽鰲栖港在彰化北境口門稍寬亦當設防此外如鹽水港北港埧仔挖吞霄後隴皆淺水小港惟本地小船出入非內

地商船之比有事塞之甚易似不足慮也其守之法莫如多築礮墩於內岸守以兵勇而令水師船守其外口夷船少則出擊多則於內港以俟彼大船不能入也以小船入則非我所畏如不勝而近岸則有礮墩兵勇以禦之彼若登岸則我之所長而彼之所短矣惟守口兵勇日久費大不能多人且恐久而生懈一旦敵至或不能得力故大口水師之外鄉勇只以二百人小口一百人早晚嚴申號令多豎旗幟在港商船亦授以大旗懸掛出港繳回使敵人自外望之不測我兵多少及乎接仗則臨時另以陸營兵往而助之以沿海各莊團練之壯勇昨已發給告示令沿海每保五十莊以上者練千人或七八百人三十莊以上者練五百人或三百人平時編立隊伍造具名冊臨時聽

調半守本莊半出禦敵視敵人之多寡大約非千人不足以戰我平時不用以養其銳臨事然後用之則皆生力軍也故無事則以守口爲正兵有事則出新兵以勝之其港內小漁船亦皆編立字號給印旗爲記朝出暮歸稽查奸宄區區之愚所私計者如此未知有當否前因勘視樹茶湖該縣所築礮墩尙未如式令更添築加以高厚寬長並多建草蔡以栖壯勇擬北路回途覆勘未知現在辦法何似得二兄親臨勘視教其不備是爲大妙北路各口亦然俟辦竣尙須並請臨勘也前備文移咨各條望詳正之